



Caderno da crítica

Cuestionario Proust: Xoán Ignacio Taibo

[Ramón Nicolás 20 marzo 2014](#)

<https://cadernodacritica.wordpress.com/2014/03/20/cuestionario-proust-xoan-ignacio-taibo/>

1.- Principal trazo do seu carácter?

– A inconstancia. Tamén a incapacidade máis absoluta para facer cartos, para o comercio e os negocios.

2.- Que calidade aprecia máis nas persoas?

– A bondade impregnada de tolerancia verdadeira.

3.- Que agarda das súas amizades?

– Que saiban escoitar. E que xamais falen de fútbol na miña presenza.

4.- A súa principal eiva?

– Verme ancorado no presente, sempre a agardar que o presente acabe.

5.- A súa ocupación predilecta?

– Viaxar no tempo. Escribir. Escribir mentres viaxo no tempo. Tamén adoitaban ser as linguas; talvez retorne a elas...

6.- O seu ideal de felicidade?

– Escribir e ler de mañanciña ao aire fresco e libre no meu recuncho.

7.- Cal sería a súa maior desgraza?

– Non quero nin pensalo: son incapaz de facer esas previsións.

8.- Que lle gustaría ser?

– Viaxeiro no tempo. Sempre que conservase o dereito ao retorno.

9.- En que país desexaría vivir?

– Nunha Galiza moito máis culta e, xa que logo, libre.

10.- A súa cor preferida?

– Azul celeste.

11.- A flor que máis lle gusta?

– A comestíbel. A flor do grelo...

12.- O paxaro que prefire?

– O pato lacado á moda de Beijing.

13.- A súa devoción na prosa?

– O social-realismo máxico. O Borges menos étnico, Cunqueiro como tendencia, Cortázar, Ferrín...

14.- E na poesía?

– A cantiga de amigo pura, Curros, os futuristas, Celso Emilio...

15.- Un libro?

– *A Odisea*.

16.- Un heroe de ficción?

– O Rei Artur, se resulta non ser monárquico. O doutor Watson, que a envexa do insoportábel Holmes teima sistemática en poñer en ridículo.

17.- Unha heroína?

– A madrastra da Brancaneve: o que tivo e aínda ten que aguantar esa muller, inxusta e falazmente deostada pola difamación ruín.

18.- A súa música predilecta?

– Bossa Nova.

19.- Na pintura?

– Su(pe)rrealistas e impresionistas.

20.- Un heroe ou heroína na vida real?

– Àngelo Colocci

21.- O seu nome preferido?

– Iria, Iago.

22.- Que hábito alleo non soporta?

– O falar sen escoitar ao outro.

23.- O que máis odia?

– Que o fútbol o impregne todo, que se poña como exemplo.

24.- A figura histórica que máis despreza?

– Franco, cos seus sucesores.

25.- Un feito militar que admire?

– Fóra da Guerra de Troia, detesto a épica. Xa que logo, como feito militar aínda só parcialmente realizado, o desarme: mágoa que os tratados para a redución de armas nunca sexan de supresión. A disolución das Forzas Armadas na Costa Rica.

26.- Que don natural lle gustaría ter?

– O don das linguas, con todas as mortas e mais as vivas.

27. – De que maneira lle gustaría morrer?

– A durmir.

28.- Cal é o seu estado de ánimo máis habitual?

– A busca do riso.

29.- Que defectos lle inspiran máis indulxencia?

– O riso, agás se rin de min.

30.- Un lema na súa vida?

– Non te precipites, análisao antes. Outro: a democracia non é ningunha situación permanente, nunca está acabada nin completa: cómpre construíla día a día con ben de esforzo.